

# Tarnimikkut Nappaatillit Maalaarutaannik Aalajangiisartut suleriaasiat pillugu Namminersorlutik Oqartussat nalunaarutaat

Tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu Inatsisartut inatsisaanni nr. 24-mi, 3. december 2012-imeersumi § 43, imm. 4, naapertorlugu aalajangersarneqarput:

## Kapitali 1

### *Tarnimikkut Nappaatillit Maalaarutaannik Aalajangiisartuni ilaasortat suliaasaallu*

§ 1. Tarnimikkut nappaatilinnik nammineersinnaajunnaarsitsineq allatsigullu pinngitsaaliisummik iliuuseqarneq pillugu Inatsisartut inatsisaanni § 41 naapertorlugu Peqqissutsimut Attaveqarnermullu Naalakkersuisoq maalaarutinut aalajangiisartunik Tarnimikkut Nappaatillit Maalaarutaannik Aalajangiisartunik taaguutilimmik pilersitsissaaq.

§ 2. Pinngitsaaliisummik napparsimavimmut unititsineq, pinngitsaaliisummik tiggummigallagassanngortitsineq, qimaasup/takkutinngitsoortup pinngitsaaliisummik utertitaanera, pinngitsaaliisummik katsorsartinneq, napparsimavimmiit angerlareernermi pinngitsaaliisummik malittarineqarneq, pinngitsaaliisummik nakorsarneqarneq, nukersorfigineqarneq, napparsimasoq illersorniarlugu nakorsaaneq, immikkut nakkutilliineq nal. ak. 24-t sinnerlugit ataavartumik ingerlanneqartoq, kiisalu immikkoortortami matunik parnaarsinissamik aalajangiinerit pillugit maalaarutit Tarnimikkut Nappaatillit Maalaarutaannik Aalajangiisartut suliarisarpaat.

*Imm. 2.* Illuatungeriit tassaapput napparsimasoq napparsimavimmilu oqartussat. Maalaarut peqqinnissakkut sullissisunut aalajangersimasunut tutsinneqarpat, taakku aamma illuatungiliuttutut inississapput.

§ 3. Tarnimikkut Nappaatillit Maalaarutaannik Aalajangiisartut suliat ataasiakkaat aalajangiiviginissaannut pingasunik ilaasortaqrput: siulittaasoq eqqartuussissuserisoq, Nunatsinni Nakorsaaneq kiisalu napparsimasut peqatigiiffannit aallartitaq tarnimikkut nappaatilinnut sinniisaasoq imal. ilaasortamut taartaasussanngortitaq.

*Imm. 2.* Tarnimikkut Nappaatillit Maalaaruteqartarfianni allaffissornikkut suliaasat Nunatsinni Nakorsaaneqarfimmit isumagineqartarput. Aalajangiisartut sulinerannut ilaasortallu akissarsiaqartinneqarunnarnerannut tunngatillugu aningaasartuutit, Peqqissutsimut Attaveqarnermullu Naalakkersuisoqarfimmit akilerneqassapput.

## Kapitali 2

### *Suliassat piareersarneqartarnerat*

**§ 4.** Inatsimmi § 42 naapertorlugu Dronning Ingridip Napparsimmavissuani tarnimikkut nappaatilinnut immikkoortorta qarfik, napparsimasup siunnersortaataluunniit kissaatigippagu, Tarnimikkut Nappaatillit Maalaarutaannik Aalajangiisartunut suliassanngortitsisinnaavoq.

*Imm. 2.* Napparsimasoq siunnersortaalu Tarnimikkut Nappaatillit Maalaarutaannik Aalajangiisartunut toqqaannartumik suliakkiisinnaapputaaq.

*Imm. 3.* Maalaarut napparsimasumit siunnersortaanilluunniit nammineersinnaajunnaarsitsinerup allatigullu pinngitsaaliissummik iliuuseqarfigineqarnerup qaangiunneraniit qaammatit arfinillit qaangiutsinnagit nassiunneqassaaq.

**§ 5.** § 4-mi taaneqartut Tarnimikkut Nappaatillit Maalaarutaannik Aalajangiisartunut suliakkiussisoqarpat, suliamut tunngatillugu allagaatit pinngitsaaliissummik iliuuseqarnernut nalunaarsuivimmit assilisat Dronning Ingridillu Napparsimmavissuani tarnimikkut nappaatilinnut immikkoortorta qarfimmi nakorsaanerup oqaaseqaataa ilanngullugu, Peqqissutsimut Pitsaaliuinernullu Aqutsisoqarfup Aalajangiisartunut nassiutissavai.

**§ 6.** Suliap tiguneqarnerani Aalajangiisartut siulittaasuata maalaarut Aalajangiisartut piginnaatitaaffisa iluaniinnersoq aalajangiivigissavaa. Maalaarut Aalajangiisartut piginnaatitaaffisa avataanniittoq qularutissaanngippat, siulittaasup oqartussanut suliarinnittussanut ingerlateqqissavaa, illuatungeriillu tamatuminnga ilisimatillugit. Pisuni allani apeqqt Tarnimikkut Nappaatillit Maalaarutaannik Aalajangiisartunit suliarineqassaaq.

**§ 7.** Suliassap tiguneqarnerani Tarnimikkut Nappaatillit Maalaarutaannik Aalajangiisartut siulittaasuata paasissutissat pisariaqartinneqartut nassiunneqarsimanersut, suna maalaarutaanersoq, pinngitsaaliissummik iliuuseqarnernik nalunaarsuiffup assilinera, nakorsaanerup katsorsaanermi akisussaasup nalunaarutaa, katsorsaanermilu pilersaarut ilanngullugit misissussavai.

*Imm. 2.* Napparsimasup siunnersortaataluunniit maalaarut Tarnimikkut Nappaatillit Maalaarutaannik Aalajangiisartunut toqqaannartumik suliakkiuppagu, Aalajangiisartut siulittaasuata Dronning Ingridip Napparsimmavissuani tarnimikkut nappaatilinnut immikkoortorta qarfimmi nakorsaaneq kiisalu Peqqissutsimut Pitsaaliuinernullu Aqutsisoqarfik maalaarut pillugu ilisimatissavai, tamatumalu malitsigisaanik Peqqissutsimut Pitsaaliuinernullu Aqutsisoqarfik, imm. 1 naapertorlugu paasissutissanik pisariaqartitanik Aalajangiisartunut nassiusseqqullugu qinnuigissallugu.

*Imm. 3.* Aalajangiisartut siulittaasuata suliap paasissutissiisutaanissaa, pisariaqarpallu nalunaarutini assigisaannillu allanik pissarsiniarnissaq aamma aalajangiivigissavaa.

**§ 8.** Aalajangiisartut imaluunniit tassani ilaasortat arlaata Aalajangiisartunit piginnaatinneqartup, suliamik aalajangersimasumik suliaqarnermut atatillugu Dronning Ingridip Napparsimmavissuani tarnimikkut nappaatilinnut immikkoortorta qarfik misissorsinnaavaat.

### Kapitali 3

#### Ataatsimiittarnerit

**§ 9.** Siulittaasup Aalajangiisartut ataatsimiinnissaasa qaqugu sumilu pinissaat aalajangertarpaa, ataatsimiinnernilu aqutsisuusarluni.

*Imm. 2.* Pissusissamisuunngitsutut isigineqanngippat, Dronning Ingridip Napparsimmavissuani tarnimikkut nappaatilinnut immikkoortortaqaarfimmi, Aalajangiisartut ataatsimiinneri ingerlanneqassapput.

*Imm. 3.* Suliat immikkut nukingiuttarillit, Inatsisartut inatsisaanni § 39, imm. 3, naapertorlugu nalinginnaasumik pinngitsaaliisummik iliuuseqarnissap kinguartinneqarneranik kinguneqartartut, ilaatigut pinngitsaaliisummik katsorsartinnissaq pillugu aalajangiinernut maalaarutit, suliassanit allanit siulliullugit suliarineqarnissaat, siulittaasumit aalajangiivigineqarsinnaapput.

*Imm. 4.* Napparsimasoq, napparsimasumut siunnersorti, Peqqissutsimut Pitsaaliuinemullu Aqutsisoqarfik, tarnimikkut nappaatilinnut nakorsaaneq pineqartoq, peqqinnissakkullu sullissisut akuusuujunnartut allat, suliap pineqartup Tarnimikkut Nappaatillit Maalaarutaannik Aalajangiisartunit qaqugu sumilu ataatsimiissutaanissaa pillugu ilisimatinneqassapput.

**§ 10.** Napparsimasup siunnersortaa maalaarutip Aalajangiisartuni oqaluuserineqarnerani Inatsisartut inatsisaanni § 32, imm. 2, oqaaseqatigiit pingajuat naapertorlugu sapinngisamik peqataatinneqassaaq. Tamanna aamma nakorsamut pinngitsaaliisummik iliuuseqarnermik aalajangiisumut maalaarutaasumut atuuppoq.

*Imm. 2.* Inatsisartut inatsisaanni § 43, imm. 2, naapertorlugu, napparsimasup siunnersortaatalu oqaatsitigut imal. peqqinnissaqarfup qarasaasiakkut attaveqaataa atorlugu, Aalajangiisartunut suliamik saqqummiussinissaq pininnaatitaaffigaat. Peqqissutsimut Pitsaaliuinemullu Aqutsisoqarfup sinniisai, tarnimikkut nappaatilinnut nakorsaaneq pisumut attuumassuteqartoq, peqqinnissakkullu sullissisut pisumut akuusuujunnartut allat taamatulli pininnaatitaaffeqarput.

*Imm. 3.* Immikkut ittunik pisoqartillugu napparsimasup peqqissusaanut imal. suliap Aalajangiisartuni suliarineqarnissaanut pingaaruteqarpat, Inatsisartut inatsisaanni § 43, imm. 2, oqaaseqatigiit aappaat naapertorlugu napparsimasup isumaqatigiinniarnermi tamakkiisumik ilaannakortumilluunniit peqataatinneqannginnissaa, aalajangiisartut aalajangiivigisinnaavaat.

**§ 11.** Tarnimikkut Nappaatillit Maalaarutaannik Aalajangiisartut ataatsimiinneri tamanut ammasuunngillat.

### Kapitali 4

#### Aalajangiisarnerit il.il.

**§ 12.** Pinngitsaaliisummik katsorsartinneq, napparsimmavimmiillu angerlareernermi pinngitsaaliisummik malittarineqarneq pillugit maalaarutunut pinngitsaaliisummik iliuuseqarnissamik kinguartitsinnaasunut, Inatsisartut inatsisaanni § 43, imm. 3, naapertorlugu, maalaarutit tiguneqarneranniit ulluinnaat arfineq marluk qaangiutsinnagit, Tarnimikkut Nappaatillit Maalaarutaannik

Aalajangiisartut aalajangiissapput.

*Imm. 2.* Suliani allani Tarnimikkut Nappaatillit Maalaarutaannik Aalajangiisartut sapinngisaq tamaat piaartumik aalajangiissapput. Maalaarutip Aalajangiisartunit tiguneqarneraniit ullut 14-it qaangiunneranni maalaarut sulii aalajangiivigineqarsimanngippat, Aalajangiisartut napparsimasooq siunnersortaa lu tamassumunnga pissutaasumik, qaqulugu aalajangiisooqarnissaata naatsorsuutigineqarsinnaaneranik ilisimatissavai.

**§ 13.** Tarnimikkut Nappaatillit Maalaarutaannik Aalajangiisartut taasinikkut amerlanerussuteqarneq tunngavigalugu aalajangiisartut.

*Imm. 2.* Aalajangiineq aalajangiinernut nalunaarsuiffimmut allanneqassaaq. Aalajangiisartuni ilaasortaq isummaminut tunngavilersuutiminik nalunaarsuiffimmut naatsumik ilanngussisoqarnissaanik piunnaasaqateqarsinnaavoq.

*Imm. 3.* Tarnimikkut Nappaatillit Maalaarutaannik Aalajangiisartut aalajangigaat tunngavilersukkat, aalajangiisartut tamakkerlutik imal. amerlanerussuteqartut isumaqatigiissutiginerat, allaganngorlugit suliarineqassapput. Aalajangiisartut aalajangigaat siulittaasumit imal. tassannga piginnaatinneqartumit atsiorneqassapput.

**§ 14.** Tarnimikkut Nappaatillit Maalaarutaannik Aalajangiisartut aalajangigaat illuatungeriinnut nassiunneqassapput.

**§ 15.** Tarnimikkut Nappaatillit Maalaarutaannik Aalajangiisartut aalajangigaat tassaasinnaapput pinngitsaaliisummik iliuuseqarnermik akuersineq imal. eqqunngitsutut naliliineq.

*Imm. 2.* Pinngitsaaliisummik katsorsaanissamik aalajangiinermik maalaaruteqarnermi, Aalajangiisartut aalajangiineq akuersinnaavaat itigartissinnaalluguluunniit. Nakorsaasiinermut annertussusiliinermullu aalajangersimasumut maalaarut tunngassuteqarpat, tamatumunngattaq aamma atuuppoq. Taamaasillutik Tarnimikkut Nappaatillit Maalaarutaannik Aalajangiisartut nakorsaammik allamik imaluunniit annertussutsimik allamik innersuussisinnaanngillat.

*Imm. 3.* Maalaarut peqqinnissakkut sullissisumutaaq/sullissisunuttaaq pinngitsaaliisummut maalaarutaasumut akuusimasumut tunngassuteqarpat, pineqartut isornartorsiorneqarnissaannut tunngavissaqarnersoq, Tarnimikkut Nappaatillit Maalaarutaannik Aalajangiisartut naliliivigissavaat.

**§ 16.** Tarnimikkut Nappaatillit Maalaarutaannik Aalajangiisartut ukiut tamaasa suliatik pillugit nalunaarummik tamanut saqqummiussissapput. Nalunaarut Dronning Ingridip Napparsimmavissuani tarnimikkut nappaatilinnut immikkoortortaarfik suleqatigalugu suliarineqassaaq.

## Kapitali 5

### *Maalaaruteqarsinnaaneq maalaaruteqarnissamullu ilitsersuineq*

**§ 17.** Tarnimikkut Nappaatillit Maalaarutaannik Aalajangiisartut napparsimasumit siunnersortaanilluunniit piunnaaffigineqarnermik naapertorlugu, pinngitsaaliisummik napparsimmavimmut unitsitsineq, pinngitsaaliisummik tigummigallagassanngortitsineq, qimaasup/takkutinngitsoortup pinngitsaaliisummik utertitaanera, napparsimmavimmiit angerlarsenermi pinngitsaaliisummik

malittarineqarneq, pinngitsaaliissummik aalaakkerneqarneq, napparsimasoq illersorniarlugu aalaakkiineq, immikkut nakkutilliineq nal. ak. 24-t sinnerlugit ataavartumik ingerlanneqartut, kiisalu immikkoortortami matunik parnaarsineq pillugit aalajangiinerit, eqqartuussisarneq pillugu inatsimmi kapitali 28-mi maleruagassat naapertorlugit, eqqartuussivimmut tunniutissavaat. Piumasaqaateqarnerup kingorna kingusinnerpaamik ulluinnaat tallimat qaangiutsinnagit eqqartuussivimmut saqqummiussisoqassaaq.

**§ 18.** Tarnimikkut Nappaatillit Maalaarutaannik Aalajangiisartut napparsimasoq siunnersortaa Kalaallit Nunaanni eqqartuussisarneq pillugu inatsimmi kapitali 28 naapertorlugu, eqqartuussivimmi aalajangiivigineqarsinnaanera pillugu ilitersussavaat. Tarnimikkut Nappaatillit Maalaarutaannik Aalajangiisartut, suliap Aalajangiisartunit eqqartuussivimmut tunniunneqarnissaa, napparsimasoq nammineq eqqartuussissuserisumik illersuisussarsisimanngippat, eqqartuussiviup eqqartuussissuserisumik napparsimasumut illersuisussanngortitsinissaa, napparsimasumut siunnersortaanullu ilisimatitsissutigissavaat.

## **Kapitali 6**

### *Nipangiussisussaatitaaneq*

**§ 19.** Tarnimikkut Nappaatillit Maalaarutaannik Aalajangiisartut nipangiussisussaatitaapput.

## **Kapitali 7**

### *Atuutilersitsinermi ikaarsaariarnermilu aalajangersakkat*

**§ 20.** Nalunaarut atuutilersinneqarpoq 16. december 2013.

*Namminersorlutik Oqartussat, ulloq 2. december 2013*

Steen Lynge

/

Ann Birkekær Kjeldsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut